

# Gui'ch barojp ni guxhaal San Pabl loj ree b́en Corinto rililadx Jesucrist

---

## Rugajpdioz Pab b́en Corinto rililadx ree Jesucrist

**1** Naj Pab, Dios bacaabee naj gacan xi apóstol Jesucrist, nē dux compniar ree Timoteo za' con naj. Naj cuca gui'ch guie par lējt guial ma rililadxidi xtiidx Dios luguiedx Corinto nē los demazri ree b́en riga' niz Acaya. <sup>2</sup>Dux Dad ree Dios con Dad Jesucrist güünle' lējt yabe'cdxe tēē reeman luxdoodi.

## Tarbajw ni gudēd Pab

<sup>3</sup>Quixtēē Dios xDad Dad Jesucrist, b́en naj Dad b́en raya dunuj ree naj tēēman Dios b́en ragu' du luxdoo ree. <sup>4</sup>Laaman ragu' du luxdoo ree loj xhietēēz guialrzagdiaj ni radüüd ree din gac yalu' ree luxdoo ree b́en cadēd xhietēēz guialzi, yalu' ree luxdoo reeman zi'c ragu' Dios du luxdoo ree. <sup>5</sup>Din majsi cayzaagdiaj da't ree guial nayajc ree xbejn Cristo, ziangajc dád ragu'man du luxdoo ree. <sup>6</sup>Abi' bal cayzaagdiajn, cayzaagdiajn din yaguieenan lējt yudar din chu' luxdoodi din laa tēēdi loj dol. Abi' bal cu'man du luxdoon, rgu'man du luxdoon din chu' luxdoodi din gac taandi lasa'

ree guialzi ni caydüüdan. <sup>7</sup>Ad yu' nawēēgt du luxdoon con lējt, din zi'cgajc cazagdiajdi ziangajc cayzaagdiajn dxel ziangajc yagu' Dios luxdoodi zi'cgajc ragu'man du luxdoon.

<sup>8</sup>Compniar raliduladx ree Jesucrist, rayēnan gagbeedi guial dád zro' naj ni baza'can niz Asia. Naya baza'can niz ni, par dunujn ad zadaantran, ad naguieentran nejz guial yabajnran mazri, <sup>9</sup>baguieenan xgab guial ma bayējtan. Per baza'can zian din yadxeguijcan guial achet zajc yaguieen dunujzan sin xyudar Dios, b́en rasban ree bengüt. <sup>10</sup>Laaman babēē dunujn loj guialgüjt guin abi' gagnēman dunujn loj lasa' ree ni nadxeb guin. Dunuj ree rayagbee guial gusnuu güünman dunujn yudar, <sup>11</sup>mazri bal güündi yudar cwedx guiniabidi Dios por dunujn. Abi' bal zien ree bejn cabejdx canab Dios por dunujn dxel zien gajc reeman gudēēd quixtēē lojman zi'c cayagnēman dunujn.

## Chexc ad wejt Pab Corinto

<sup>12</sup>Abi' ni rabaan rnin lojdi guial achetzi naduladxan guial

rayagbeen nabajnan naya delant lojdi nē delant loj ree bénguidxliuj, abi' diidxli cayguieenan ni rayal yaguieenan. Per ad cayguieentan zian por dux quiarguiejnzan, cayguieenan zian por xyudar Dios. <sup>13</sup>Loj dux gui'chan ad racaatan ni ad zajct goolidi o ni ad zajct chignia'di. Balzianclaa chignia'di gra ni canin lojdi. <sup>14</sup>Zi'cgajc ta'ngaj cayagbeedi guial chi gui't Dad Jesucrist zatijb lējt yabaadi con dunujn guiáad dunujn yabaan con lējt.

<sup>15</sup>Laan naj ni yu'guican, zeel yaloj benan xgab nidganan lējt din nabaadi guial ma barojp volt bidganan lējt. <sup>16</sup>Benan xgab nidganan lējt chi nialan niz Macedonia, abi' chi nazaan Macedonia nialan nidganan lējt stijb, dxel nagu'nejzidi naj par Judea. <sup>17</sup>Ad güüнди xgab guial chi rnin guidganan lējt rnizan zian. Ad güüнди xgab guial rünan zi'c rüjn gra ree bénguidxliuj, ganin guialan abi' ragbeen guial ad zialtan. <sup>18</sup>Dios ragbee guial ad raguie'chtan yaguieenan ni rayagbeen ad zaguieentan. <sup>19</sup>Din Jesucrist Xi'n Dios, b́en ni ma baguien xtiidx lojdi, naj con Silvano con Timoteo, ad najt Jesucrist b́en na güünman ni ragbeeman ad zijntaman, laaman ganax diidxli rnieeman. <sup>20</sup>Din por laaman rajc cumplid gra ree xpromejs Dios. Zeel por laaman raguie'ch ree “Amén” chi radēd ree quixtē loj Dios. <sup>21</sup>Abi' Dios laaman cayüjn dunuj ree yudar con lējt dín yadxu'dxi'ch ree loj ni nayajc ree tijbzi con Cristo, Dios bacaabee dunuj ree dín yayajc

ree par laaman. <sup>22</sup>Laaman gule dunuj ree par laaman, abi' guxhaal xSprijtaman b́en nabajnné' ree zi'c tijb sen guial yaca' ree ni yaca' ree.

<sup>23</sup>Yan bal gadan ga Corinto zi'c benan xgab, Dios ragbee guial gadan ga guial ad rēntan gadilē'n lējt, abi' Dios gudēd naj casti bal id wali ni canin. <sup>24</sup>Ad cayguieentan naguiejn yanabeen lējt xhienaag chililadxidi Jesucrist, din dunujn rayagbee guial diidxli za'dxi'chidi loj ni rliladxidi Jesucrist, ni cayguieenan naj guial yaguieenan lējt yudar din chu' luxdoodi nix guibandi.

**2** Zeel benan xgab ad zidganatan lējt yan, chitēe chu'naya luxdoodi. <sup>2</sup>Din bal gagu'nayan luxdoodi, ¿chuza cu' luxdon nix bal ma badxe'nayan luxdoodi lējt ragu' luxdon? <sup>3</sup>Zeel bacan zi'c bacan loj gui'ch ni guxhalan lojdi, din chi guialan ad cu'di luxdon naya luar cu'di luxdon nix. Abi' naj ragbee bal yu' luxdon zagdxe gradi yu' luxdoo zagdxe por zian. <sup>4</sup>Chi bacan gui'ch guie dád guyun xgab abi' guyunayan xt ronan bacan diidxnaa ni bacan loj gui'ch guie, per ad bacatan gui'ch guin par gagu'nayan lējt, bacanan par gagbeedi guial rēn da'tan lējt.

**Yu' perdon par b́en badxe' falt**

<sup>5</sup>Bal yu' tijbidi ma badxe'naya naj, per ad najtzi guyunaya nēgajc lējt guyunaya. Rnin nē lējt chitēe gadēēdlajn guial ganin graczidi guyunaya por zian. <sup>6</sup>Per naj rni lojdi compniar raliduladx ree Jesucrist, ma gojczy yan con casti ni ma badēēdidi loj b́en guin. <sup>7</sup>Yan

gol beenman perdon gol bagu' t   luxdooan chit   chu'naya luxdooan xt ad zadxejlt xhie g  nman. <sup>8</sup>Zeel rniaaban lojdi, gol been naguiejn din gagbeeman guial r ndi laaman zi'cgajc guy ndi laaman guia'xchej. <sup>9</sup>Gui'ch ni guxhalan lojdi gocli, guxhalanan din gagbeen bal ruzoobidi da diidxan guial g  ndi gra ni ganin lojdi. <sup>10</sup>Yan chut  z b n g  ndi perdon, n gajc naj g n laaman perdon. Abi' b n ma benan perdon, bal yu' ni g nan perdon, benan laaman perdon delant loj Cristo por l jt <sup>11</sup>chit   g  n xindxab dunuj ree gan, din dunuj ree rayagbee xhienaag naj xguialrusquiee xindxab.

#### Ad nixt guyu luxdoo Pab guzujman Troas

<sup>12</sup>Chi bidxinan guiedx Troas par ganen xtiidxza'c Jesucrist, d d gogn  Dios naj par g nan mandad guin ni. <sup>13</sup>Per ad nixt guza'can guial ad bidxaaglojtan dux compniar ree Tito. Zeel basa'nan b n guin ree abi' wan Macedonia.

#### Ragn  Jesucrist dunujn zianczi

<sup>14</sup>Per quixt   Dios guial por Jesucrist guixie guixie cayagn man dunujn chit   xhie g  n dunujn gan abi' por dunujn cayagbee ree bejn xtiidxza'c Jesucrist, diidxza'c guin ree naj zi'c tijb ni rliaa nejxh ni rire'ch cha' guidibczi. <sup>15</sup>Abi' por Jesucrist dunujn nayajc zi'c tijb go'xh ni rliaa nejxh delant loj Dios, go'xh ni rdxin loj ree b n rliadlx Jesucrist n  loj ree b n ad rliadlx. <sup>16</sup>Par ree b n ad rliadlx laaman,

dunujn nayajc zi'c tijb go'xh ni rug jt, per par ree b n rliadlx laaman dunujn nayajc zi'c tijb go'xh ni runee guialnaban. Per,  chu zajc g  n ree ni guin sin xyudar Dios? <sup>17</sup>Dunujn ad cayguieentan negojs con xtiidx Dios zi'c r jn garol ree bejn, dunujn raguieenan zi'c rayal, zi'c ma bacaabee Dios dunujn yaguieenan. Abi' Dios ragbee guial por guial nayajcan xbejn Cristo zeel raneen xtiidxaman.

#### Nejz c b ni yu' par yadxin ree loj Dios

**3** Chi ranan zian, ad naladxidi guial dunuj gajcan cayles dux valoran. L jt ragbee guial ad r jnt naguiejn yal  n tijb gui'ch lojdi par gagbeedi chu dunujn o yanaaban gui'ch lojdi ni g  n dunujn yudar par gagbee ree bejn chu nayajcan zi'c r jn ree ben ren. <sup>2</sup>Din l jt gajc naj tijb gui'ch par dunujn, gui'ch ni yu' du luxdoo ni rool ree bejn ni n nbee t   reeman. <sup>3</sup>Zi'c rul   yaguie'ch ree l jt naj tijb xtiidx Cristo ni bacaan, per ad bacaatanan con tint, bacaanan con xSprijt Dios b n naban, tijb ni ad cwat loj tijb guiaj nata', cwan luxdoo ree bejn.

<sup>4</sup>Dunujn raya'p Dios confianz por Jesucrist, <sup>5</sup>abi' ad raguieentan xgab guial yu' ni raguieen dunujzan, din gra ni raguieenan, raguieenan laan con xyudar Dios. <sup>6</sup>Dios naj b n razaladx dunujn quiarguiejn par yagojnan bejn ree xcwent nejz c b ni ma yu' par yadxin ree loj Dios, nejz c b ni ad ryaadxt chinal bejn tijb ley ni z  d loj gui'ch, per r jn naguiejn chinalaman ni z  d por xSprijt Dios. Din ley castizi naj ni

zidńen, per xSprijt Dios guialnaban naj ni rud́eeman loj ree bejn.

<sup>7</sup>Abi' majsi castizi naj ni zidńe ley ni bad́e Dios loj Moisejs loj tijb guiaj nata', per dád bidiin bacha' loj Moisejs chi cwa'man ley guin, xt ad gojct nuguaa ree b́en Israel lojman por bacha' guin, bacha' ni ta'ngaj ta'ngaj gunidlojn. <sup>8</sup>Bal chi bi't ley guin gojc zian, yan, imazri ni za'cdxoon naj guial gucaagdiajg ree bejn xcwent nejz cúb ni ruluú xSprijt Dios ni ma rajp bejn con Dios! <sup>9</sup>Din chi bi't ley ni ridńe casti par ree bejn, con bacha' bi'tan, yan, imazri ni za'cdxoon naj guial guien ree bejn xhienaag gac reeman naya delant loj Dios! <sup>10</sup>Abi' bal ni za'cdxoon gojc chi bi't xley Dios loj guidxliuj guie, yan achetczi lasajc guialza'cdxoon guin par guialza'cdxoon ni naj por nejz cúb ni ma rajp ree bejn con Dios. <sup>11</sup>Abi' bal ni ad rújnt sirv par gra tiamp, bi'tan con tijb ni za'cdxoon, yan mazri ni za'cdxoon naj ni ad yu't dxej nit.

<sup>12</sup>Abi' guial yu'guijc ree zian, zeel sin guialrdxeb caylüünan bejn ree. <sup>13</sup>Ad raguieentan zi'c been Moisejs, basiaaw lajd lojman chit́e gagbee ree b́en Israel guial ziquied guialrulaa bacha' lojman, bacha' ni laa gunit gajc. <sup>14</sup>Per ad lojtzi Moisejs biaaw, ne gajc xquiarguejgn ree bejn biaaw. Din xt yandxej chi rool reeman loj xtiidx Dios ni bacaa Moisejs, achet rignia' reeman, tijbzi por Jesucrist zajc chignia' reeman laan. <sup>15</sup>Per xt yandxej chi rool reeman ni bacaa Moisejs ad rignia't reeman guial sta nayaaw xquiarguejgn reeman. <sup>16</sup>Per b́en

rililadx Jesucrist, laaman rxhial xquiarguejgnman. <sup>17</sup>Din tijbzi naj Jesucrist con xSprijt Dios, abi' lod ma naban bejn con xSprijt Dios achetri rniabee laaman. <sup>18</sup>Zeel achetri nayaaw duloj ree zi'c been Moisejs, din dunuj ree nayajc ree zi'c guiaawajn lod rguien xbacha' Jesucrist abi' chaawladx cayajc ree zi'c ŕenman yayajc ree, abi' guixie guixie cusniman dunuj ree por xSprijtaman.

**4** Zeel zi'c ma baya Dios dunujn abi' gulejman dunujn par yaneen xtiidxaman, ad zadxagtan yagueenan mandad guin. <sup>2</sup>Dunujn achet raquie'chan, achet ni ad rúnjt sirv caygueenan, ad caysquieetan bejn ree ad caychaa t́eetan xtiidx Dios. Dunujn cayneen ni naj xtiidxli Dios, abi' bejn gajc ree zajc gagbee guial caygueenan xnejz delant loj Dios. <sup>3</sup>Per bal yu' b́en ni ad rignia't xtiidxza'c Jesucrist ni cayneen, ad rignia'taman laan guial ad źetaman loj xnejz Dios. <sup>4</sup>Abi' xindxab rniabee loj guidxliuj guie ma bascajyix xquiarguejgn reeman, guial ad ŕent reeman chililadx reeman, chit́e gusni xtiidxza'c Jesucrist laa reeman abi' ad zajct guguaa reeman xguialrniabeeman, laaman guial najman zi'c gajczi Dios. <sup>5</sup>Ad caytie'chtan dux tiidx gajcan, ni caytie'chan naj xtiidxza'c Jesucrist, b́en naj Dad par dunuj ree. Abi' ni ranazan lojdi guial caygueenan sirv ĺejt por guial raýenan Jesucrist. <sup>6</sup>Abi' laagajc Dios ni gunabee persi bani loj guidxliuj guie chi gule'cchaawaman laan, laagajcaman basni dux quiarguejgnan, guxhalaman dux

quiarguiejnan din yayignia'n xhienaag naj xguialrniabeeman, guialrniabee raguiaa ree por Jesucrist.

**Yabajn ree por guialrliladx**

<sup>7</sup>Gulejman dunujn par yaguieenan ni cayguieenan, majsi nayajczan zi'c guiajs bajn din guiguieen guial gra guialrniabee zëéd por Dios ad por dunujtan. <sup>8</sup>Majsi graloj guialzi caydüüdan per ad ralenya'tan. Majsi ruliüü achetri zajc yaguieenan, per radxejl gajc xhienaag yaguieenan. <sup>9</sup>Majsi xhietëéz rüjnnë bejn dunujn, per ad riro'nladxt Dios dunujn. Rguin reeman dunujn per ad runidlojt reeman dunujn. <sup>10</sup>Bantëéz guin zio'n nadxu'n loj guialgüjt zi'cgajc guzajc Jesucrist, per zian ralüün guial raya'pan xguialnabanman. <sup>11</sup>Dxel la'tgaj nabanán, guixie guixie nadxu'n loj guialgüjt guial nayajcan xbejn Jesucrist, per zian ralüün guial raya'pan xguialnabanman, majsi guidxin dxej nit dux cuerpan. <sup>12</sup>Nadxu'n loj guialgüjt guial caytie'chan xtiidx Jesucrist, per por zian ma rajpidi guialnaban delant loj Dios.

<sup>13</sup>Loj xtiidx Dios rëb: "Guial bililadxan, zeel gunen ni gunen." Yan ziangajc guial raliduladxan xtiidx Dios zeel cayneen laan. <sup>14</sup>Din dunujn rayagbee guial Dios, bén basban dux Dad ree Jesucrist loj guialgüjt, ziangajc yasbanman dunuj ree guial ma nayajcan tijbzi con Jesucrist dxel lëjt con dunujn tijbzi chignëman dunuj ree lod zojbaman. <sup>15</sup>Din gra ni cayguieenan në gra ni cayza'can,

cayza'can zian din yaguieenan lëjt yudar din gusnuu gacxhie j ni rililadxidi Jesucrist. Zian ma gac ree bejn mazri zien gudëéd reeman quixtëé loj Dios, guza't tëé reeman laaman zagdx.

<sup>16</sup>Zeel ad ralenya'tan. Din majsi cayoxh dux cuerpan por mandad guin, per dux sprijtan guixie guixie caycüb Dios laan. <sup>17</sup>Achetzci lasajc ree guialzi ni caydüüdan loj guidxliuj guie din najn ni rdëd, per por guialzi guin ree rayalan xguialnaza'c Dios, guialnaza'c ni lasajc mazri abi' ad yu't dxej nitan. <sup>18</sup>Din dunuj ree ad cayguieent ree naguiejn yaya'p ree ni raguiaa ree loj guidxliuj guie, cayguieen ree naguiejn din yaya'p ree ni ad raguiaa ree. Din ni raguiaa ree loj guidxliuj guie yu' dxej nit reen, per ni ad raguiaa ree yan ad yu't dxej nit reen.

**5** Dunuj ree rayagbee guial dux cuerp ree naj zi'c tijb yu cenci par dux sprijt ree loj guidxliuj guie, yu ni yu' dxej nit. Per rayagbee ree guial xanyabaa Dios guneen dunuj ree stijb cuerp, cuerp ni ad gojct por bénguidxliuj zi'c rajc tijb yu, abi' cuerp guin yaya'p ree par tiblayaa. <sup>2</sup>La'tgaj raya'p ree cuerp guie loj guidxliuj ralu' ree guialquia, par dunuj ree xi nix diob guidxin dxej yaya'p ree cuerp ni yaya'p ree xanyabaa. <sup>3</sup>Din ad ganaxtizti Sprijt yayajc ree xanyabaa, nëgajc cuerp yaya'p ree. <sup>4</sup>La'tgaj raya'p ree cuerp ni raya'p ree loj guidxliuj guie, cayzaagdiajn nadxu'n xgab por ni cayza'can. Ad ranatan guial rayënan yayëjtan, ni rayënan naj guial yaya'pan cuerp cüb ni

yaya'pan par tiblayaa din nit dux cuerpan ni rayal nit. <sup>5</sup>Dios been dunuj ree zi'c nayajc ree abi' banee xSprijtaman duloj ree zi'c tijb sen guial gac zi'c naman gac.

<sup>6</sup>Zeel zianczi raya'p ree confians, abi' dunuj ree rayagbee guial la'tgaj nabajn ree loj guidxliuj guie, zijt nadxu' ree guial lod zojb dux Dad ree Jesucrist. <sup>7</sup>Per dunuj ree zunaal reeman guial raliduladx ree laaman ad guial raguaat ree xhienaag gac. <sup>8</sup>Zeel raya'p ree confians guin, abi' ma rayen ree yasa'n ree cuerp ni raya'p ree loj guidxliuj guie din yo' ree yuchu' ree con Jesucrist. <sup>9</sup>Zeel achet gúunan bal loj guidxliuj guie o bal xanyabaa, per ni rayen ree naj guial yaguieen ree zi'c ren Cristo. <sup>10</sup>Din dugra ree rayal yadxin lojman lod gúunman guialguxtis din tijbgaj dunuj ree yaca' ni rayal ree, por ni zagdxe o por ni mal ni baguieen ree loj guidxliuj guie.

#### **Xhienaag gap bejn nejz par guidxinman loj Dios**

<sup>11</sup>Zeel por respejt ni raya'p ree Jesucrist, cayguieen ree naguiejn guidxga' ree bejn xtiidxaman. Abi' Dios ragbee guial dunuj ree cayguieen ree zi'c rayal, balzianclaa nē lējt gúunbee dunujn guial dunujn cayguieencan xnejz. <sup>12</sup>Ad caylest dux valoran, ni rayenan naj guial yabaadi guial gagbeedi ni naj diidxli por dunujn, din gac yadxi'di diidx loj ree b́en rújn naguiejn yaya'n reeman zagdxe delant loj ree bejn luar gúun reeman xgab xhienaag naban reeman delant loj Dios. <sup>13</sup>Yan bal par bejn rajc duguijcan por

ni cayguieenan, per cayguieenan laan por Dios. Abi' bal par lējt nadēdguieenan zeel cayguieenan mandad guie, cayguieenan laan par yaguieenan lējt yudar. <sup>14</sup>Guial rēn Cristo dunujn zeel cayguieenan ni cayguieenan, din dunujn rayagbee guial Cristo gújt par gra bejn abi' gra ree bejn ma naj zi'c bengüt par dol. <sup>15</sup>Abi' Jesucrist gújtaman por gra bejn din b́en chililadx ree laaman ad zabajntri reeman zi'ctzi rēn reeman, ma guiban reeman zi'c rēnman, laaman guial gújtaman por laa reeman abi' babanman stijb. <sup>16</sup>Zeel bal guia'xchej baguieen ree xgab guial naj Cristo tijbzi b́enguidxliuj, per ad najtri dux xgab ree zian por laaman. Abi' ad rayidxga'tri ree guial chu naj bejn, <sup>17</sup>din chutēez b́en ma naj tijbzi con Cristo, ma bidxaa mod ni nabanman. Ma nabanman garen guial loj ni gubanman guia'xchej.

<sup>18</sup>Per gra nine naj por xyudar Dios, laaman been persi raya'p ree nejz par yadxin ree lojman por Jesucrist, abi' laaman gule dunujn din yagojnan bejn ree xhienaag din gap reeman nejz par guidxin reeman lojman. <sup>19</sup>Din tijbzi naj Dios con Jesucrist abi' por Jesucrist rújn Dios naguiejn gap ree bejn nejz par guidxin reeman lojman, por Jesucrist ma nayab ree bejn sin dol delant loj Dios, zianan naj ni bacaabeeman dunujn yagojnan bejn ree. <sup>20</sup>Zeel dunujn nayajc b́en canee por Cristo, caydēedan xtiidx Dios din gagbee ree bejn xhie rniab Dios gúun reeman. Abi' por Jesucrist ranaaban lojdi: Gol guzuj zagdxe con Dios. <sup>21</sup>Din Jesucrist

achetczi dol beenman, per por dux tol ree baslaa Dios güjtaman zi'c tijb béndol din por laaman, cuguiaa Dios dunuj ree zi'c tijb bén ni ad wayüjnt dol.

**6** Zeel zi'c cayguieenan xmandad Dios, dunuj ranaab lojdi: Ad güünbee xlia'di guial rën Dios læjt. <sup>2</sup>Din loj xtiidxaman rëb:

Chi bidxin dxej guidxga'n lüj,  
bidxga'n lüj  
abi' chi bidxin dxej gapil perdon dxel beenan lüj yudar.

Abi' dunuj rana lojdi guial ma bidxin dxej guin par læjt, ma bidxin dxej guidxga' Dios læjt në dxej güünman læjt perdon.

<sup>3</sup>Dunuj ad cayguieentan tijb ni güün guial ad zaliladxtri ree bejn Jesucrist, ad cayguieentan tijb ni guiëb ree bejn guial ad cayguieentan zi'c balüün bejn ree. <sup>4</sup>Par gra caylüün bejn ree guial dunuj nayajc bén cayüjn sirv Dios caydaan tëen xhietëëz ni raza'can, zi'c guialzi, tarbajw, ni naya, <sup>5</sup>në guial naa ni rüjn ree bejn dunuj. Në guial rgu' reeman dunuj ladxguiib, rgu' tëë reeman dunuj loj wadijl, ni radxagan guial tant zien ni raguieenan, ni ralëen bacaal, ne guialrliaan ni radiüdan. <sup>6</sup>Caylüü tëen bejn ree chu nayajcan guial nabajnan zi'c rayal, guial rayagbeen conin naj diidxli, guial raya'pan pacens nayajc tëen benza'c con ree bejn, guial nabajnan con xSprijt Dios, guial diidxli rayënan ben ren ree, <sup>7</sup>guial ranen ni naj diidxli, guial cayüjn Dios dunuj yudar, në guial radëen consejw loj ree bejn o radxi'n xtiidx ree bejn con xtiidx Dios. <sup>8</sup>Yu' dxej rajp ree

bejn dunuj respejt, yu' tëë dxej rnieeguijdx reeman dunuj. Yu' dxej rniee reeman diidxza'c ree por dunuj, yu' tëë dxej rniee reeman dunuj diidxguijdx. Rüjnnë reeman dunuj zi'c bén rusquiee majsi diidxli naj ni raneen. <sup>9</sup>Yu' dxej rüjn reeman zi'c bén ad nünbeet dunuj, majsi nünbee reeman dunuj. Majsi rulüü ma yayëjtan per ad rayëjttan, abi' majsi xhietëëz rüjnnë reeman dunuj per ad rugüjtt reeman dunuj. <sup>10</sup>Majsi yu' naya du luxdoon, per raguieenan naguiejn din guiguien guial yu' du luxdoon nix. Majsi bénprob dunuj per por dunuj zien ree bén ma naj rijcw niz loj Dios guial ma ragbee reeman xtiidxaman. Majsi achet raya'pan loj guidxliuj guie, per achet rayaadxan.

<sup>11</sup>Bén Corinto, dunuj ma ranan gra por dunuj, achet ni naguie'ch par dunuj guial diidxli rayënan læjt. <sup>12</sup>Dunuj ad rlioxt rayënan læjt, læjt bal id rënridi dunuj. <sup>13</sup>Per naj rniënë' læjt zi'c rniënë tijb dad gra xi'nman: Gol guyën dunuj zi'c rayënan læjt.

**Nayajc ree zi'c xyadoo Dios naban**

<sup>14</sup>Gol gojp cudad xhie ree compromis güündi con ree bén ad rliladxt Dios, din garen naj xixgab ree bén ma zinal ree xnejz Dios guial loj xixgab ree bén contzi naban. Garen naj xixgab ree bén ridxga' xtiidx Dios guial loj xixgab ree bén ad ridxga't laan. <sup>15</sup>Læjt ragbee guial ad zajct gac Cristo tijbzi con xindxab, ziangajc garen naj bén rliladx Cristo guial loj bén ad rliladxt laaman. <sup>16</sup>Garen naj ree

b́en rliadx dux Dad ree Dios guial loj ree b́en rliadx ni naladx reeman naj dios. Din dunuj ree guial raliduladx ree Dios naban, dunuj ree nayajc xyadooman zi'c rēb tiblajt loj xtiidxaman lod rēb:

Naj gabajnnē' laa reeman gazu tēen con laa reeman bantēēz guin che reeman.

Naj gac xDios reeman abi' laa reeman gac da bejnan.

<sup>17</sup>Rēb tēē loj xtiidx Dios:

Gol barii loj ree ben mal, gol been tiblād.

Ad güüindi ni dxuudx din yaca'n lējt,

<sup>18</sup>abi' naj gac tijb Dad par lējt guiáad lējt gaquidi da xi'ngaanan nē daxi'ndxa'pan.

Zian rēb dux Dad ree Dios b́en ca' gra guialrniabee.

**7** Ni guin ree naj ree promejs ni ma been Dios con dunuj ree nayajc ree b́en rliadx ree Jesucrist. Zeel rayal yaguieen ree naguiejn yabajn ree naya. Yasa'n ree tiblād dol, xgab mal, nē gra ree ni dxuudx. Abi' guixie guixie yaguieen ree naguiejn yabajn ree zi'c rēn Dios por respejt ni raya'p reeman.

**Rabaa Pab guial bayüjn ree b́en Corinto xgab por xtol reeman**

<sup>2</sup>iGol gojc benza'c con dunujn! Dunujn achet waguieenan lējt, achet ni mal waguieenan lējt ad wasquiee tēetan lējt. <sup>3</sup>Ad naladxidi caneguijdxan lējt, din zi'c ma rnin lojdi diisd guia'xchej guial dunujn rayēnan lējt, abi' majsi yayējtan o majsi yabajnan per tijbzi nayajcan con lējt. <sup>4</sup>Dád ra'pan lējt confianz abi' dád rabaanē'n lējt. Majsi

xhietēēz guialzi caydüüdan, per zi'c rgu'di du luxdoon nix zeel dád rabaan, majsi xhietēēz cayza'can

<sup>5</sup>Din diisd chi badxinan niz Macedonia achetzi guial yaziiduladxan por gra ni cayza'can, zi'c ni rüjnnē ree bejn dunujn nē guialnadxeb ni caydüüdan. <sup>6</sup>Per Dios b́en ragu' luxdoo ree b́en yu'naya luxdoo, laaman bagu' du luxdoon chi bi't Tito guie. <sup>7</sup>Abi' ad guialzi bi'ttaman bayu du luxdoon nix, nē guial bagu'di luxdooman zeel bayu du luxdoon. Naman du lojn guial dád rēndi guguiaadi naj, yu' tēēdi xgab yu'naya tēēdi por naj. Laan naj ni rabaanē'n guial yu'quidi xgab por naj.

<sup>8</sup>Majsi naya guyu luxdoodi por gui'ch ni guxhalan lojdi, per achet naladxan. Majsi dád naya guyu luxdon chi guxhalanan guial ragbeen zunayadi tiblādēd, <sup>9</sup>per yan nix yu' luxdon, ad guial guyu nayatidi, yu' luxdoon nix din por guialguyunaya guin ma bayüjndi xgab zēdi loj xnejz Dios. Guyunayadi abi' gudaandi zi'c rēn Dios, abi' achet ni mal baguieenan lējt. <sup>10</sup>Din chi runaya luxdoo bejn zi'c rēn Dios, guialrunaya guin rüjn yudar persi rayüjn bejn xgab por xtolaman, zian rarii bejn loj casti, abi' ad yu't dxej yayüjn bejn xgab guial gulaaman loj casti guin. Per guial runaya luxdoo bejn abi' ad rüjntaman naguiejn chu'man loj xnejz Dios, dxel ad zajct gapaman guialnaban delant loj Dios. <sup>11</sup>Per lējt gol baguiaa zi'c ma been yudar guial guyunayadi abi' gudaandi zi'c rēn Dios. Por guial guyunayadi nayob beendi naguiejn bazuxnejzidi



ni ma rnin cayüjn tijb lëjt, abi' balendi bidxeb tēēdi por ni cayüjnx. Dxel ma rēnejzdoodi gazun con lëjt, badēē tēēdi laax casti zi'c rayal. Por gra ni beendi zian biguien guial achet dol rajpidi por zian. <sup>12</sup>Gui'ch ni guxhalan lojdi, ad guxhaltanan guialzi rünan xgab por bén cayüjn dol guin o guial rünan xgab por bén cazagdiaj por xtol bén guin. Guxhalan gui'ch guin lojdi din guluüdi loj Dios guial yu'guijqquidi dunujn. <sup>13</sup>Laan naj ni rabaanē'n guial beenquidi zian.

Abi' yan mazri rabaan guial raguiaan Tito yu' luxdooan zagdxe baguiaadaman guial dád naza'c gojqquidi con laaman. <sup>14</sup>Zeel ad basa'nxtutidi naj por gra zi'c bazatan lëjt lojman. Din gra ni rēn por lëjt naj diidxli zi'c ragbeedi guial dunujn ganax diidxli raneen, abi' tēē diidxli naj ni raguie'chan loj Tito por lëjt. <sup>15</sup>Yan dad rusaaladxaman lëjt guial rusaaladxaman xhienaag bazoobidi xtiidxaman nē gra respejt ni gopidi laaman chi guzuman con lëjt. <sup>16</sup>Dád nix yu' luxdon guial ra'pan lëjt confianz par gra.

### Guial rudēēd gon con guidib luxdoo

**8** Yan compniar raliduladx ree Jesucrist, rayēnan gagbeedi xhienaag cayagnē Dios bén rliadx ree Jesucrist niz Macedonia. <sup>2</sup>Majsi xhietēēz cazajc reeman, per ad rucwēēzt rguien guial dád rabaa reeman. Majsi dád bēnprob reen, per dad rabaa reeman rudēēd reeman cintabl par gagnē reeman bejn ree. <sup>3</sup>Naj ragbee guial diidxli been reeman yudar bejn ree xt

lod baneetzan laa reeman. Laa reeman been yudar mazri guial loj ni baguieenan xgab, sin guial chu güün laa reeman naguiejn. <sup>4</sup>Dád been reeman naguiejn du lojn din yatiējban guial nē laa reeman güün yudar bén rliadx ree Jesucrist, <sup>5</sup>abi' been reeman yudar mazri guial loj ni baguieenan xgab, laan naj guial diidxli ma basa'n laagajc reeman loj Dios, laan naj ni been reeman yaloj. Zeel yan ma za' reeman par güün reeman ni yaguie'chan loj reeman guial rēn reeman güün reeman zi'c rēn Dios. <sup>6</sup>Zeel yan zi'c ma guzuloj Tito cuto'paman yudar guin, raguie'chan lojman din gulox guto'paman laan entr lëjt. <sup>7</sup>Dunujn rayagbee guial par gra zagdxe zēdi: Diidxli rliadxidi Jesucrist, ragbeedi xcwentaman, achet ryaadxidi par guinieedi xtiidxaman, za'sindi par güündi laaman sirv rēn tēēdi dunujn, yan gol been naguiejn din guiguien guial najdi benza'c par güündi yudar con ni ranan lojdi. <sup>8</sup>Ad rüntan lëjt naguiejn guial gudēēdi ni rdo'p, per rugojnan lëjt zi'c rabaa ree ben ren guial rüjn reeman yudar, din bal rēndi guluüdi guial diidxli rēndi xcompniaridi. <sup>9</sup>Din lëjt ragbee zi'c naza'c Dad Jesucrist, bén basa'n gra guialnaza'c xanyabaa, abi' bi'taman loj guidxliuj zi'c tijb bén ni achet rajp din por laaman yayal nē lëjt xguialnaza'c Dios.

<sup>10</sup>Zeel rnin lojdi guial zagdxen gulooxidi ni guzulojdi gudibijz. Yaloj lëjt been xgabza'c guial güündi yudar, abi' laa guzuloj gajquidi. <sup>11</sup>Yan zi'cgajc yu' luxdoodi nix guzulojdi, ziangajc gol babaa

gusnuudi gudēēdi ni rdo'p zi'ctzi galguzujdi. <sup>12</sup>Din chi diidxli rēn bejn gūinman yudar, xhietēēz naag zajc gūinman yudar. Ad rayalt gudēēdaman xt ni ad rajptaman.

<sup>13</sup>Ad canitan lojdi guial tēdidi tarbajw cwe'quidi xt ni ad rajptidi par gūiindi yudar b́en ryaadx ree xhienin chitēē xhie guiyaadx reeman, ni rayēnan naj guial tibloj yaguieen dulasa' ree yudar. <sup>14</sup>Yan lējt zajc gūiindi yudar b́en ryaadx ree xhienin, dxel despuejs gūin reeman lējt yudar con ni ryaadxidi. Zian tibloj yaguieen du lasa' ree yudar. <sup>15</sup>Loj xtiidx Dios rēb: “B́en bato'p zro' achet been sobr, abi' b́en bato'p ta'nzi achet biaadxaman.”

#### Tito con ree xcompniaraman

<sup>16</sup>Quixtēē Dios badēēman loj Tito lasa'gajc xgab rūnan por lējt. <sup>17</sup>Yan chi raguie'chan lojman guidganajman lējt, laa cwēb gajcaman guial ma rēnman guguaaman lējt, ad beent naguiejn chu niniabee ni'taman.

<sup>18</sup>Abi' con laaman cayxhaalan stijb dux compniaran b́en ma nūnbee ree dux compniar ree b́en rliadx ree Jesucrist guidibczi, guial rulūuman bejn ree xtiidxza'c Dios zagdx. <sup>19</sup>Ma bacaabee tēē ree dux compniar raliduladx ree Jesucrist laaman din saman con dunujn din gūinman dunujn yudar yune'n ni cado'p. Abi' yudar guin cado'pan din guiguien guial rayēnan yaguieenan yudar stijb ree dux compniar ree, abi' por yudar guin guza't reeman Dad Jesucrist zagdx. <sup>20</sup>Zeel cwabee b́en guie din saman con dunujn chitēē xhie guacaquia

reeman dunujn por gra yudar ni cado'p ni naca'n par yugsa'nan.

<sup>21</sup>Din dunujn rayēnan yaguieenan gra zi'c rayal, ad naabtizi loj Dad Jesucrist, nē loj ree bejn.

<sup>22</sup>Yan cayxhaalan Tito con b́en guin cayxhaalnē'n laa reeman stijb dux compniaran b́en ma balu'been zien volt guial diidxli rēnman gūinman yudar, abi' mazri yan guial dád rajpaman lējt confians.

<sup>23</sup>Bal chu guiniabdiidx por Tito, gol gūjdx guial da compniaran najman, laaman cayūjn naj yudar par gūnan lējt yudar chinalidi xnejz Dios. Guíaad za' tio'p dux compniaran b́en zē ree con laaman, dux compniar ree b́en rliadx ree Jesucrist guxhaal laa reeman, abi' ruza't reeman Jesucrist zagdx.

<sup>24</sup>Yan gol balūū loj reeman guial diidxli rēndi bejn ree, din por laa reeman gagbee ree los demazri ree compniar rliadx Jesucrist xcwentidi, din guguaia tēē reeman guial ni diidxli naj ni ma rēn loj reeman xcwentidi.

#### Yudar par ree xbejn Jesucrist.

**9** Yan por yudar ni rayal yale'can par yaguieenan yudar dux compniar ree b́en rliadx ree Jesucrist, ad ryaadxt ganin mazri xcwentan, <sup>2</sup>din naj ragbee guial ruladxidi gūiindi yudar. Abi' xt nix yu' luxdon rēn loj ree b́en Macedonia guial lējt b́en Acaya diizd gudibijz cayūjndi naguiejn cayūjndi yudar, abi' gra ree b́en Macedonia been naguiejn gūin yudar chi biguiejn reeman zian. <sup>3</sup>Zeel caxhalan Tito con za' tio'p ree dux compniar ree din guiguien

guial waliqui ni ma gunen por lęjt xcwent yudar guin, din gũundi naguiejn gũundi yudar zi'c ma rēn por lęjt. <sup>4</sup>Din bal guidnē'n tio'p choon ree b́en Macedonia ad yadxaaglojn lęjt ad za'tidi porvinid, abi' natun par naj chitēē ganin natun par lęjt por confianz ni ra'pan lęjt. <sup>5</sup>Zeel benan xgab rēn loj Tito con za tio'p dux compniar ree guial mejorli ned gaj reeman guidganaj reeman lęjt, din gũun tēē reeman yudar guloox guto'p reeman yudar ni ma nadi din ma najn purvinid chi guialan. Zian guiguien guial diidxli rēndi yazaladxidi ad gualzi canabeetan lęjt.

<sup>6</sup>Naj rni lojdi b́en rxūbin ta'n, ta'n gajc raca'man, guiáad b́en rxūbin zro', zro' gajc raca'man. <sup>7</sup>Tijbgaj lęjt gol badēē zi'c naj xixgabidi gudēēdi, ad mal gant ad naguiejn tēēt, din Dios rēnman b́en razaladx guidib luxdoo. <sup>8</sup>Abi' Dios rajpaman gra gualrniabee par gũunman lęjt yudar gapidi gra ni ryaadxidi chitēē xhie guiyaadxidi din gũundi yudar zi'c rayal. <sup>9</sup>Loj xtiidx Dios rēb:

B́en ni rgui's ni rajpaman abi' rudēēman laan loj ree b́enprob, ad yu't dxej yayanladx reeman ni zagdxe ni rŷjnman.

<sup>10</sup>Yan Dios b́en razaladx bin rxūbin bejn, b́en razaladx guialraw par ree bejn, laaman gulūū lęjt xhie gũundi din gapidi gra ni rayal gapidi, din gac gũundi yudar mazri b́en ryaadx ree xhienin. <sup>11</sup>Zian mazri naj ni gunee Dios lojdi din gusnuu gũundi yudar yazaladxidi. Abi' por yudar ni guixhiaalnēdi dunujn par ree compniar rililadx ree Jesucrist, laa

reeman gudēēd quixtēē loj Dios.

<sup>12</sup>Abi' yudar guin ad zŷjntan sirv naabzi par loj ni ryaadx reeman laan, gũunan sirv nē par gudēēd reeman mazri quixtēē loj Dios.

<sup>13</sup>Por yudar guin gagbee reeman guial cuzoobquidi xtiidxza'c Jesucrist zi'c rililadxidi laan abi' guga't reeman Dios zagdxe por zian, nē guial najdi benza'c rgui'sidi ni rajpidi par laa reeman nē par gra ree b́en ryaadx laan. <sup>14</sup>Abi' zēn reeman lęjt, cwedx tēē reeman Dios por lęjt por xgab za'c ni baneē Dios lojdi guial gũundi yudar. <sup>15</sup>iQuixtēē Dios por ni ma bazaladxaman duloj ree por xi'nman, xt ni'quid radxejlt xhie yaguie'ch ree por zian!

#### Guialrniabee ni rajp Pab guial najman xi apóstol Jesucrist

**10** Naj Pab, yu' ree b́en na guial benza'c naj chi za'n con lęjt, abi' chi za'n zijt sin guial rdxeb rdiilē'n lęjt. Per zi'cgajc ninieenē Cristo lęjt con respejt nē con diidxza'c, rniaaban lojdi guial <sup>2</sup>xi nix chi guialan guidganan lęjt ad rŷjnt naguiejn gadilē'n b́en rēb ree por da xgabzan cayūnan ni cayūnan, din ad rdxebtan ganenē'n laa reeman. <sup>3</sup>Walican nayajcan b́enguidxliuj, per ad raguieentan naguiejn yaguieenan gan por dux xgabzan zi'c rŷjn ree b́en ad zinalt xnejz Dios. <sup>4</sup>Ad raguieentan naguiejn yaguieenan bejn ree gan por dux xgabzan, dunujn raguieenan gan por xgualrniabee Dios, gualrniabee ni zajc guse'n xhietēēz ni mal. <sup>5</sup>Por gualrniabee guin baguieenan gan loj ni rudxiib ree bejn duguijcan, abi' baguieen

t́een gan loj guial nadxal reeman ni rudxoon ǵuünbee reeman Dios. Zianan rase'nan xhiet́eéz xgab din chile' gucaagdiajg reeman xtiidx Jesucrist. <sup>6</sup>Abi' ĺejt chi ma cuzoobidi xtiidx Dios diidxli, dxel dunujn ma nadxu'n par yazuxnejzan gra ree b́en ad wazoobt diidx zagdx.

<sup>7</sup>Ĺejt mazri ridxga'di zi'c ruguiaadi bejn. Bal yu' b́en ŕujn xgab guial diidxli najman xbejn Cristo, rayal cu'guijcaman guial nayajc ree xbejn Cristo zi'cgajc laaman. <sup>8</sup>Abi' majsi ganin lojdi mazri xcwent guialrniabee ni banee Dios lon, ad ratutan din laaman banee guialrniabee par ǵunan ĺejt yudar chignia'di mazri xcwent xnejzaman ad par gunijttan ĺejt. <sup>9</sup>Ad naladxidi guial ŕenzan gucheban ĺejt con ree da gui'chan. <sup>10</sup>Din yu' ree b́en ni ŕeb guial diidx naa abi' sin guialrdxeb rniene'n ĺejt loj ree da gui'chan, abi' chi za'n con ĺejt ni'quid rulúüt lasajcan par ĺejt, ni'quid radxat loj ree bejn ni rnien. <sup>11</sup>Per naj rnin lojdi guial b́en ŕeb ree zian rayal gagbee reeman guial zi'cgajc raneene'n ĺejt loj dux gui'chan chi nadxu'n zijt, ziangajc zajc yaguieenan chi nadxu'n con ĺejt.

<sup>12</sup>Din dunujn ad raguieentan zi'c ŕujn ree b́en rliex valor gajc, per ni'czi ta'n ad raguieentan xgab yaguieenan zian. Din nitontzi ŕujn reeman chi rliex valor gajc reeman, ruguiaa laagajc reeman xhienaag naj reeman par ree stijb xcompiar reeman. <sup>13</sup>Per dunujn ad ralest dux valor gajcan mazri guial loj ni rayal, din dunujn ranazan ni

naj diidxli zi'c gulej Dios dunujn yaguieenan, yan ma cwéjbaman badxinan ladxidi. <sup>14</sup>Zeel ad ǵuüendi xgab guial cadédté caynabeen ĺejt, din yalój dunujn bio'p ladxidi par yasiidan ĺejt xtiidxza'c Jesucrist. <sup>15</sup>Dunujn ad ralest dux valor gajcan por tijb ni been stijb bejn. Per raléézan guial ni's xguialrliladxidi, din yasnuu yaguieenan ĺejt yudar gusnuu ǵuünbeedi ni rayal gagbeedi xhienaag rayal yaguieen ree. <sup>16</sup>Zian ma zile' yo'n mazri delant ladxidi par yatie'chan xtiidxza'c Jesucrist, per lod achut wazuloj chit́eé yales dux valor gajcan con ni ma been ben ren.

<sup>17</sup>Bal yu' b́en ŕen guilies xvalor gajc, mejorli guiliesaman xvalor dux Dad ree Dios. <sup>18</sup>Din ad b́en rliest xvalor gajc naj b́en raya'n zagdx loj Dios, b́en raya'n zagdx naj b́en rliex valor Dios.

#### Pab con ree apóstoles b́en rusquiee ree

**11** Yan, iXi nix taandi naj con tio'p choon ree da xgab tontan! Per naj rni lojdi gol gudaan naj. <sup>2</sup>Naj ŕenan ĺejt zi'cgajc ŕen Dios ĺejt. Zi'cgajc tijb dad rajp xi'ndxa'p biin ni ma naj guxhliaa din chile' guidxinm naya loj xin tia' laam, zian ŕenan guidxine'n ĺejt loj Cristo naya sin dol. <sup>3</sup>Per rdxeban chu' b́en gusquiee ĺejt zi'c basquiee béel Eva, abi' ad zújntridi xgab guidib luxdoodi xcwent Jesucrist. <sup>4</sup>Din chi ri't ben ren ŕuman diidx lojdi xcwent Cristo, per garen guial zi'c ma balúün ĺejt, o chi ri't b́en ren ŕuman diidx lojdi xcwent Sprijt, per ad lasa't xSprijt Dios b́en

ma nabannëdi, o chi ri't ben ren lojdi naman xhienaag din gapidi perdon, per garen guial loj ni ma ranan lojdi, lëjt laa ridxga' gajquidi laa reeman. <sup>5</sup>Per naj ruliüü achet ryaadxan delant loj ree bèn rëb laa reeman naj quijb xi apóstoles Jesús. <sup>6</sup>Din majsi achet sirv naj par ganen, per ad ryaadxtan guialrignia' abi' lëjt ragbee guial diidxlin por gra ni ma baguiaadi baguieenan.

<sup>7</sup>Per, ¿chuj ni ni malan benan ya guial ad bentan benro' lojdi persi benan gan gojquidi xbejn Cristo, në guial ad baquijxtan lëjt chi basidan lëjt xtiidx Dios? <sup>8</sup>Ben renli ree bèn naj ree xbejn Cristo cwa'n xmilia reeman persi beenan naj yudar la'tgaj guzun con lëjt persi basidan lëjt xtiidx Dios. <sup>9</sup>Abi' chi guzun con lëjt, chi biaadxan xhienin ad gunaabtán lojdi güüindi naj yudar, bèn Macedonia ree bèn rliadx ree Jesucrist laa reeman bidnë ni biaadxan nadxel. Ad goct wanin lojdi guneedi xhienin par naj, ad yu' tëet dxej ganin guial rüjn naguiejn güüindi naj yudar. <sup>10</sup>Zi'c najn xbejn Cristo rnin lojdi ni naj diidxli, guial niz Acaya Achutczi zajc gudxoon guial chu' luxdon zagdxé guial guiën ni benan con lëjt. <sup>11</sup>Abi' ¿chexc zeel benan zian con lëjt? ¿Guial ad rëntan lëjt ya? Per Dios ragbee guial dád rënan lëjt.

<sup>12</sup>Abi' gusnuu günan zi'c cayünan xt yandxej guial ad zanaabtcan lojdi güüindi naj yudar, din chitëë xhie guinee ree bèn ruladx guilies xvalor gajc guial naj reeman xbejn Jesús guial zi'cgajc cayguieenan cayüjn reeman. <sup>13</sup>Din laa reeman rëbzi reeman guial naj reeman xi

apóstoles Jesús, rusquieezi reeman bejn ree rüjnzi reeman zi'c ruliüü naj reeman xi apóstoles Jesús. <sup>14</sup>Per xt ni'quid radxat loj bejn por zian, din xt xindxab zile' guliüüloj loj bejn zi'c tijb xianjl Dios. <sup>15</sup>Dxel xt ni'quid radxat loj bejn guial bèn ni cayüjn ree xmandad xindxab rëb reeman guial laa reeman cayüjn xmandad Dios. Per laa reeman zayal reeman casti ni rayal reeman por ni cayüjn reeman.

### **Tarbajw ni gudëd Pab guial najman xi apóstol Jesucrist**

<sup>16</sup>Yan canin lëjt stijb: Ad naladxidi guial ad nadëdguientan, per bal rüjnzi xgab zian gol basa'n za naj ganen zi'c tijb bèn ad nadëdguient din nëgajc naj gales da valoran majsi tibda'nzi. <sup>17</sup>Ad nat Dios guial gales da valoran zi'c cayünan, per gales da valoran zi'c tijb bèn ad nadëdguient. <sup>18</sup>Zi'c yu' zien ree bèn rlies xvalor gajc por ni rüjn reeman loj guidxliuj guie, yan ziangajc naj gales da valor gajcan. <sup>19</sup>Din guial najdi bèn rignia' ad nawëëgt naj taandi bèn ad nadëdguient ree. <sup>20</sup>Rdaandi bèn rniabee ree lëjt rüjn reeman zi'ctzi rën reeman, rdaandi bèn rtia' ree ni rajpidi, bèn rusquiee ree lëjt, o rniee reeman lojdi ganax ree diidx nabë abi' xt rtiëjbidi rëëz reeman ro'di. <sup>21</sup>Majsi natu'n par naj, per naj rni lojdi guial ad baya'ptan valor guial naguieennë'n lëjt zian.

Per bal rlies xvalor reeman por xhiedxitzinin, nëgajc naj zajc gales da valoran. Canen lojdi zi'c tijb bèn ad nadëdguient, din ad xnejztan. <sup>22</sup>Per bal na reeman

gui'al naj reeman b́en Hebreo, ńegajc naj naj b́en Hebreo. Bal na reeman gui'al naj reeman b́en Israel, ziangajc naj b́en Israel gajc naj. Bal na reeman gui'al loj xdiaa Abraham źeéd reeman, ńegajc naj zial loj xdiaa Abraham. <sup>23</sup>Abi' bal na reeman gui'al xmandad Cristo cayüjn reeman, naj mazri cayünan xmandadaman. Majsi zi'c rníee b́en ad nadédguient rnien chi rnin zian, per diidxli gui'al naj mazri ma benan xmandad Cristo gui'al loj reeman. Abi' por zian mazri ma guyun ladxguiib gui'al loj reeman, mazri ma gudijn ree bejn naj gui'al loj reeman abi' mazri zien volt ma guzun loj gui'algüjt. <sup>24</sup>Gaay volt ma gudijn ree b́en Israel naj, abi' beegaj gudijn reeman naj zi'ctiubitap volt rugaz reeman duu ladan. <sup>25</sup>Choon volt gudijn reeman naj con yag, abi' tib volt bacaagui'aj reeman naj. Choon volt ma wej barcw lod za'n xan nijsdoo, abi' tibdxej tibgui'aaal baya'nan loj nijsdoo. <sup>26</sup>Guidibczi lod ma wan, gudéedan loj ree ni nadxeb chi gudéedan loj ree gui'iw, loj ree b́engubaan, loj ree b́en ladxan b́en Israel ree ńe loj ree b́en ad najt b́en Israel. Ma gudéed t́een loj ree ni nadxeb luguiedx ree, dajn ree, loj nijsdoo, ńe loj ree b́en rusquíee na reeman gui'al naj reeman xbejn Cristo. <sup>27</sup>Dád ma guzaagdiajn. Dád zien volt ma gulén bacaal, ma gulaanan, ma we'can nijs, abi' ma guyu dxej ni achet'czi gudawan. Ma gognajlan, ma biaadx t́eé da xaban.

<sup>28</sup>Abi' ad laatzanan ma guza'can, zien ree ni ma guza'can. Abi' guixie guixie rúnan xgab por ree xbejn

Cristo b́en zojb ree niz lod ma wan. <sup>29</sup>Bal xhie cazajc tijb ree b́en rililadx Jesucrist, cayünan xgab por laaman. Abi' bal cusquíee reeman tijb ree b́en rililadx Jesucrist par güünman dol, dád ralenan yu' t́een laaman xgab. <sup>30</sup>Bal rüjn naguiejn gales da valor gajcan, tijbzi ni ganin por naj, naj por gui'alrzagdiaj ni ma gudéedan. <sup>31</sup>Abi' Dios xDad Dad Jesucrist, laaman b́en rayal respejt guidib tiamp, laaman ragbee gui'al diidxli naj ni canen. <sup>32</sup>Tiamp chi canabee rey Aretas, wan luguiedx Damasco dxel gunabee gobernador luguiedx guin biaaw nejz par guiniaaz reeman naj. <sup>33</sup>Per guyu ree b́en ni badxe' naj lén tijb dxüm abi' gulet reeman naj niz ro' ventan ni naj ro' ze' ni nayaw guiedx guin, zian gulaan loj gobernador guin.

### Ni balüüloj lon

**12** Achet rüjn bejn gan gui'al guilies xvalor gajcaman, per rayal ganin lojdi por ree ni balüüloj lon ńe ree ni balüü Dad Jesucrist naj. <sup>2</sup>Naj nünbee tijb xingui'aaaw rililadx Jesucrist, ma gojc chidaj ijz wejx xanyabaa lod zojb Dios. Ad ragbeetan bal biné xcuerpix o xsprijtzix wej, ad ragbeetan, tijbzi Dios ragbee. <sup>3</sup>Bal biné xcuerpix o xsprijtzix wej, ad ragbeetan, tijbzi Dios ragbee. Per naj ragbee <sup>4</sup>gui'al wejx lod zojb Dios, lod biguiejnx diidx ni xt ni'quid radxejlt xhienaag niníeex laan gui'al ad rayalt gagbee gra bejn laan. <sup>5</sup>Bén zii zajc galesan xvalor, per ad rliestan da valor gajcan, ni rnizan por naj por ree gui'alrzagdiaj ni ma gudéedan. <sup>6</sup>Abi' majsi gales da

valoran, ad cay ntan zi'c tijb b n ad nad dguient din ganax ni diidxli naj ni ganin. Per ad r ntan zian chit   yadxaloy bejn naj mazri guial loj ni rayal por ni ruguiaa reeman r nan, o por ni riguij n reeman rnien.

<sup>7</sup>N  par chit   gales da valoran zro' por gra ni ma bal   Dios naj, cad  dan tijb guialzi ni naj zi'cgajc zi'c chi yu' tijb gui jch tiblajt bejn. Laan naj xchiin xindxab par g  nnaax naj chit   gales da valoran. <sup>8</sup>Choon volt ma canaaban loj Dios din chiquiedaman guialzi ni cad  dan, <sup>9</sup>per laaman na lon: "Zi'c r nan l j achet gac, din mazri rguien da guialrniabeen chi cazagdiaj bejn." Zeel rabaan por ree guialrzagdiaj ni cad  dan din guiguien guial nabananan con xguialrniabee Cristo. <sup>10</sup>Rabaan por xhiet  z guialrzagdiaj ni cad  dan, o n  chi rnieeguijdx bejn naj, o chi ryaadxan xhienin, o chi xhie r jn bejn naj, n  gra ree tarbajw ni cad  dan, guial cad  dan laan guial r nan Cristo. Din chi cazaagdiajn dxel mazri ra'pan xyudar Cristo.

**Yu' Pab xgab por ree b n rliiladx Cristo luguiedx Corinto**

<sup>11</sup>Gunen 'n l jt por naj gajc zi'c tijb b n ad nad dguient, per l jt rajp dol guial benan zian. Din l jt naj b n rayal guillies da valoran delant loj ree b n ni r b guial laa reeman naj quijb xi ap stoles Jesucrist. Din majsi tijbzi b n ad r jnt sirv naj, per achet ryaadxan delant loj reeman. <sup>12</sup>Chi guzun con l jt ad balenya'tan guial g nan

milagr ree n  gra los demazri ree ni badxalojdi ni benan n  graloj ree ni benan ni been sirv zi'c sen guial diidxli najn xi ap stol Jesucrist.

<sup>13</sup>Gra zi'c ma benan con gra ree compniar rliiladx Jesucrist lod ma wan, ma benan laan con l jt. Tijbzi ni ad bentan con l jt naj guial ad rnitan lojdi guial g  ndi naj yudar con gra ni ryaadxan la'tgaj guzun con l jt, per bal guneguijdxan l jt por zian iGol been naj perdon!

<sup>14</sup>Yan ma cay nan xgab guidganan l jt stijb, laan naj ni yayon volt guidganan l jt. Abi' ni'qui yan ad zanitan lojdi guial g  ndi naj yudar, ad ni rajptidi r nan, l jt naj b n r nan. Din ad xi'nt bejn rguuil xhienaag guibanman, dad guin ree rguuil xhienaag guiban ree xi'n reeman. <sup>15</sup>Abi' majsi gra ni ra'pan g nan gaxt, o majsi yadib da cuerpan par g nan l jt yudar, per achet g  nan. Majsi rul   chi mazri r nan l jt, ta'nzi r ndi naj.

<sup>16</sup>Walican guial ad gunaabtan lojdi niagn di naj nuneedi xhienin, per yu' ree b n r b guial benan zian din nasinan par gusquien l jt. <sup>17</sup> Wen basquieen l jt ya chi guxhalan b n bidganaj ree l jt? <sup>18</sup>N  chi r n loj Tito guial gui'taman guidganajman l jt abi' guxhalan laaman con stijb dux compniar ree b n rliiladx Jesucrist,  wen yu' ni basquiee Tito lojdi ya?  Nid zi'c laaman zi'c naj tiblojzi naj xgab raguieenan ya abi' zi'cgajc r nan r jnman?

<sup>19</sup>Por gra ni ma ranan lojdi, ad naladxidi guial caylaj dunuj gajcan, din achet waguieenan l jt. Dios

ragbee guial zi'c nayajcan xbejn Cristo cayneen'́n l'ejt, abi' gra ni caynan lojdi najn par yaguieenan l'ejt yudar chinalidi xnejz Dios guial ray'́enan l'ejt. <sup>20</sup>Din rdxeban guial chi guialan guidganan l'ejt ad zadxaaglojtan l'ejt zi'c r'́enan, abi' l'ejt ad zuguaatidi naj zi'c r'́endi guguaadi naj. Rdxeban gadxaaglojn l'ejt con wadijl, guialnad'́edloj, guialrdxe'ch, guialrlies xvalor gajc, guialrniee guijdx lasa', guial ruza't bejn, guial r'́ijn benro' n'́e guial ad nadxagri lasa'di. <sup>21</sup>Rdxebe t'́een guial chi guidganan l'ejt stijb abi' yaya'nxtun por l'ejt delant loj Dios. Abi' d'́ad chu' naya luxdon por zien ree lasa'di b́en ad rb'́ezt ree r'́ijn dol, b́en ad ray'́ijnt ree xgab zi'c naban reeman. Ad rucw'́e'zt r'́zun'́e reeman b́en ad najt lacheel reeman, ad rucw'́e'z t'́e'et reeman vijs ni rajp reeman o stijb ree ni ad r'́ijnt sirv ni r'́ijn reeman.

### Diidx bigra bacaa Pab loj gui'ch guie

**13** Yan ni yayon volt guidganan l'ejt. Chi guialan, gra ni nadi por stijb ree xcompniaridi, rayal chu' tio'p o choon testiw din guiguien guial diidxli naj ni canadi. <sup>2</sup>Abi' zi'c r'́en loj ree b́en ni cay'́ijn dol chi bialan bidganan l'ejt ni barojp volt zi'cgajc ma rnin loj gradi, laagajcan canin lojdi yan za'n zijt guial chi guialan guidganan l'ejt stijb, achet'́czi ni t'́ed zezi par ree b́en ni cay'́ijn dol. <sup>3</sup>Zian gagbeedi ni r'́endi gagbeedi guial Jesucrist cunee diidx ni rayal ganin lojdi. Abi' Jesucrist achet ryaadxaman par g'́u'́inman zi'c rayal g'́u'́inman con l'ejt abi' con

l'ejt cul'́u'́i xguialrniabeeman ni rajpaman. <sup>4</sup>Walican g'́ujt Jesucrist loj cr'́i'́jz zi'c tijb b́en ad rajpt guialrniabee, per yan nabanman por xguialrniabee Dios. Abi' zi'c g'́ujtaman zi'c tijb b́en ad rajpt guialrniabee ziangajc dunuj ree rul'́u'́i ad raya'pt ree guialrniabee, per zi'c nayajcan xbejn Cristo raya'pan xguialrniabee Dios par yaguieenan ni rayal yaguieenan con l'ejt.

<sup>5</sup>L'ejt gajc gol been xgab bal walidi rililadxidi Jesucrist. L'ejt gajc gol been xgab xhienaag nabandi. Gol gogbee guial ma nabandi con Jesucrist, bal id rn'́ieezidi guial rililadxidi laaman. <sup>6</sup>Balzianclaa gagbeedi guial dunujn diidxli r'aliduladxan laaman. <sup>7</sup>Abi' rarejdxan Dios por l'ejt chit'́e' g'́u'́indi ni mal, ad par yaya'ntan zagdxe delant loj ree bejn, cayguieenan zian par g'́u'́indi ni naj zagdxe, majsi par ree bejn ad cayguieentan zi'c rayal. <sup>8</sup>Per ad zajct yaguieenan tiblad ni naj diidxli, dunujn caynazan ni naj diidxli. <sup>9</sup>Zeel yu' du luxdoon nix achet g'́u'́inan ni cayza'ctzan din chile' sudxi'chidi loj ni rililadxidi. Abi' rarejdxan Dios din gagbeedi guidiblagaa xhienaag guibandi xnejz. <sup>10</sup>Abi' caxhalan gui'ch guie lojdi dxelri guidganan l'ejt, din chi guialan guidganan l'ejt ad ryaadxt gadil'́e'n l'ejt por guialrniabee ni bane Dad Jesucrist lon, guialrniabee ni baneeman lon par g'́unan l'ejt yudar chignia'di mazri zagdxe xnejz Dios, ad par gunijttan l'ejt.

<sup>11</sup>Yan compniar r'aliduladx ree Jesucrist par guloxan gui'ch guie,



naj rni lëjt: Gol badxe' luxdoodi zagdxe, gol been naguiejn gol gubajn zi'c rayal, gol bagu' luxdoodi gol gubajn tëë zagdxe, gol babe'cdxe luxdoodi con ree xcompniaridi. Abi' Dios bèn rën dunuj ree rabe'cdxe tëëman du luxdoo ree laaman gagnë lëjt.

<sup>12</sup>Xhietëëz hor ni radxaag ree xcompniaridi, gol bagajpdioz lasa'di zi'c rayal. <sup>13</sup>Gra ree dux compniar ree bèn rililadx ree Jesucrist niz guie rugajpdioz reeman lëjt.

<sup>14</sup>Dad Jesucrist güünle' gradi, guial rën Dios lëjt abi' xSprijtaman gagnë lëjt zianczi. Amén.